



Broj:03/1-50-14-7-16-11/16
Sarajevo, 1.2.2016.

PREDMET: Informacija o posjeti NATO Defence College Zajedničkoj komisiji za odbranu i sigurnost Parlamentarne skupštine BiH

Polaznici Koledža NATO-a iz Rima, koji su bili u studijskoj posjeti Bosni i Hercegovini, dana 9.12.2015. posjetili su Parlamentarnu skupštinu BiH, gdje im je domaćin bila Zajednička komisija za odbranu i sigurnost BiH.

Gostima iz Koledža NATO-a, s general-majorom Januszom Bojarskim na čelu, u zgradi PSBiH su prigodnim obraćanjima dobrodošlicu poželjeli: Borjana Krišto, predsjedavajuća Predstavničkog doma, Ognjen Tadić, predsjedavajući Doma naroda, i Sifet Podžić, predsjedavajući Zajedničke komisije za odbranu i sigurnost BiH. Sastanku su prisustvovali i: Bariša Čolak i Hanka Vajzović, članovi Zajedničke komisije, Boško Šiljegović, parlamentarni vojni povjerenik BiH, Bojan Ninković i Marin Vukoja, sekretari domova PSBiH, Ljiljana Milićević, sekretarka, i Željko Grubešić, stručni savjetnik u Uredu sekretara ZK.

U svojim izlaganjima i prezentacijama predstavnici Parlamentarne skupštine BiH istakli su aktuelnu političku i ekonomsku situaciju u BiH, stanje po pitanju euroatlantskih integracija, te upoznali prisutne o aktivnostima Zajedničke komisije za odbranu i sigurnost BiH po pitanjima nadzora i stanja u sektoru odbrane i sigurnosti BiH.

U razgovoru koji su predstavnici Koledža NATO-a imali s predstavnicima Parlamentarne skupštine BiH bilo je riječi o brojnim pitanjima koja karakteriziraju aktuelno stanje u sektoru odbrane i sigurnosti. Goste iz Rima interesiralo je stanje po pitanju trošenja budžetskih sredstava, proces nadzora nabavki vojne opreme, stanje u procesu protuminskih akcija i izrade posebnih strateških dokumenata kao što su „Pregled odbrane“ i „Sigurnosna politika BiH“ te proces uknjižbe vojne imovine, što je navedeno kao preduslov za početak realizacije Akcionog plana za članstvo BiH u NATO-u.

Isto tako, goste iz Koledža NATO-a interesiralo je kako se sektor sigurnosti u cjelini suprotstavlja i nosi s aktuelnim sigurnosnim izazovima, kako se odvija regionalna saradnja, odnosi sa susjednim zemljama, tok saradnje s međunarodnim organizacijama koje djeluju u BiH te problemi koji se rješavaju na putu BiH ka Evropskoj uniji i NATO-u.

Nakon dvosatnog razgovora zaključeno je da je ovaj vid dijaloga s polaznicima Koledža NATO-a od posebne važnosti i za predstavnike PSBiH i goste, koji se po završetku Koledža

vraćaju na visoke pozicije u oružanim snagama, sektoru sigurnosti i diplomatije svojih zemalja, kako članica NATO-a i EU, tako i drugih, koji tradicionalno šalju svoje polaznike na ovaj prestižni koledž.

Predstavnici Koledža NATO-a s generalom Bojarskim na čelu su se na kraju zahvalili predstavnicima PSBiH, koji su im u otvorenom razgovoru odgovorili na mnoga pitanja i time pomogli boljem razumijevanju aktuelne situacije u BiH. Izražena je želja da se saradnja sa Zajedničkom komisijom za odbranu i sigurnost i PSBiH nastavi i u buduće.

Predsjedavajući
Zajedničke komisije
Sifet Podžić

Dostavljeno:

-naslovu

- a/a